




Sabtu, 07 November 2020

Jeremia 38:1-13



Cara Tuhan Nampati



Cara Tuhan nampak kalak si ernalem man baNa banci saja la tersipati. Lit sada kesaksin Morianta maka latih akapna rukur sabap dua kalak anakna enggo tamat kuliah tapi lenga sada pe dat dahin. Sekali jadi melamar dahin me anakna si no.2 ku salah sada rumah sakit i Medan. Anakna enda ndai ikut tes ras temanna ka ndeher kutana. Tes si pemena anak ndai la lulus tapi temanna ndai lulus. Sedih kal nandena e, rikut junggut-junggutna man Tuhan, uga maka la lulus anakku e, bage latihna ku akap nekolahkensa, lanai ka lit bapana. Lanai naring ate Tuhan aku mekuah bage nina ngerana. Kenca tes si peduaken teman anakna ndai pe la ka lulus. Andiko ari, kai nge ate Tuhan e, uga pe sedih naring nande teman anakku e nina ka. 2 minggu berikutna masuken anakna ndai lamaren ku rumah sakit si i Kabanjahe ras temanna ndai, kenca ndalani proses ujian ras wawancara, duana ia ialoken erdahin i rumah sakit e. Nina nandena ndai bujur Tuhan, lit kepe atendu si terulin, sabap adi min ndai lulus anakku e i RS i Medan, ia enggo ka kost, ndauh ras aku biaya nggelu petambah. Tapi adi i Kabanjahe, lanai ia perlu kost, banci mulih-mulih i rumah nari, tetap ia tading ras aku. Ndauh kepe ulin si irencanakenndu asa si ku ukuri Tuhan. Carandu nampak la tersipati aku. Alemi aku bas junggut-jungutku ndube man baNdu. Kesaksin nande e banci ka si kawitken ku bas kesaksin Jeremia tupung ia itangkap tua-tua Jahudi erkiteken nuriken kata si tuhu i bas Tuhan nari. La senang kalak e meg i berita ukumen si ipeseh Jeremia man bangsana. Raja Zedekia pe la ngasup nahan pernembah ate bangsa e man Jeremia. Emaka itama me Jeremia ku sumur si lanai lit launa tapi idemi alu lumpur. Bergehen ia, kote kal kulana, melihe ka. Tapi kalak si erkeleng ate man Tuhan ikeliniNa. Reh me sekalak kalak Sudan si erpangkat, Ebed-Melekh gelarna. Ipindokenna man raja gelah ipulahi Jeremia, ras pemindonna e ibereken raja. Bage me Ebed-Melekh ras telu kalak temanna ngangkat Jeremia i bas sumur nari. Kenca ndarat i bas sumur nari Jeremia itahan i bas ingan si aman eme i bas kesain pengawal istana. Erkiteken perbahanenna, Ebed-Melekh selamat arah kematen asum Jerusalem runtuh iserang Babil.